

## SUL CYFFREDIN 7

1 BRENHINOEDD 19:1-4 [5-7] 8-15A;  
SALMAU 42-43; GALATIAID 3:23-29; LUC 8:26-39

---

---

### ● Gweddi agoriadol

Drindod gogoneddus,  
gwna ni yn ymwybodol  
o'th bresenoldeb yn y lle hwn  
drwy ein haddoli a'n gweddi.  
Boed i'r rhai na allant fod yma  
o achos tostrwydd  
neu amgylchiadau  
dy adnabod,  
er mwyn i bawb gael eu bendithio  
gan dy bresenoldeb,  
Drindod gogoneddus.

### ● Moliant

Dduw y daeargryn,  
y gwynt a'r tân,  
datguddi dy hun  
yn y cyffredin  
a'r anghyffredin,  
mewn bywydau prysur byw bob dydd  
ac mewn arwyddion a rhyfeddodau  
sy'n ein hysgwyd i'n seiliau.  
Clywir  
gogoniant dy fawrhydi  
yn sibrawd tyner  
awel y gwanwyn,  
ac yn rhu erchyll  
y ddaeargryn.

Boed i'n clustiau a'n meddyliau  
fod ar agor i'r posibilrwydd  
dy fod yn siarad â ni,  
a boed i'n calonnau  
fod yn effro i'th alwad.

● **Cyffes**

Y bore hwn  
a phob bore,  
wrth i ni wynebu diwrnod  
a ofnwn o achos disgwyliadau  
a osodir arnom gan eraill,  
yn drwm gan feichiau,  
yn ansicr o beth ddaw,  
ein gwrthwynebu,  
    yn unig,  
    yn ofnus,  
atgoffa ni  
i ti wynebu hyn  
    a mwy,  
er mwyn i ni ddod yn rhydd  
o'r cadwyni sy'n ein clymu,  
a chodi uwchlaw  
    a'r tu hwnt  
i drafferthion ein byd  
a phrofi gwir heddwch  
yn dy freichiau.

● **Diolch**

Gwnaethost gymaint drosom,  
a ninnau eto heb ddweud wrth y byd  
mor fawr yw ein Duw.

Paid â gadael i ni anghofio  
yr iachâd a'r maddeuant a brofasom.

Paid â gadael i ni anghofio  
ôl dy droed, lle dilynwn ninnau.

Paid â gadael i ni anghofio  
yr hedyn cariad a heuwyd yn ein calonnau.

Paid â gadael i ni anghofio  
dy drugaredd pe crwydrem oddi wrthyt.

Paid â gadael i ni anghofio  
agosrwydd a gwres dy goflaid.

Paid â gadael i ni anghofio  
dy aberth gwirfoddol drosom ni.

Gwnaethost gymaint drosom;  
paid â gadael i ni anghofio dweud wrth y byd,  
yn ddiolchgar,  
mor fawr yw ein Duw.